

«11» փետրվարի 2022թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Էդմոնդ Գրիգորյանի վերաբերյալ նյութերը.

Պ Ա Ր Զ Ե Ց Ի '

2021 թվականի դեկտեմբերի 18-ին ՀՀ ՊԵԿ Մաքսանենգության դեմ պայքարի վարչության աշխատակիցները զննման են ենթարկել ՀՀ-ից ՌԴ մեկնող «Volvo» մակնիշի «772XX72» պետհամարանիշի բեռնատար ավտոմեքենան, որի արդյունքում պարզվել է, որ «Բրիգ» ՍՊԸ-ի անվամբ Արևելյան մաքսատուն-վարչության Բագրատաշենի մաքսային կետ-բաժնում լրացված 18.12.2021թ. թիվ 05100033/181221/0046718 տարանցման հայտարարագրում և թիվ B-08 հաշիվ-ապրանքագրում նշված է 3414 կգ համաքաշով ծիածանափայլ իշխանի հատիկավոր ձկնկիթ, սակայն փաստացի առկա է ընդհանուր՝ 3373 կգ քաշով ձկնկիթ, որից 2947 կգ համաքաշը՝ կարմրավուն խոշոր հատիկավոր ձկնկիթ, իսկ 426 կգ համաքաշը՝ մանր դեղնավուն հատիկավոր ձկնկիթ:

Փաստի առթիվ Էդմոնդ Գրիգորյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Վարչական վարույթի ընթացքում Էդմոնդ Գրիգորյանը բացատրություն է տվել այն մասին, որ իր կողմից վարվող «Volvo» մակնիշի «772XX72» պետհամարանիշի բեռնատար ավտոմեքենայով ՀՀ-ից ՌԴ ձուկ տեղափոխելու նպատակով նախապես կնքված պայմանագրի համաձայն «Քինգ» և «Բրիգ» ՍՊԸ-ների անվամբ Գեղարքունիքի մարզի Նորատուս գյուղից բեռնվել է ձուկ և 18.12.2021թ-ին ուղևորվել է Բագրատաշենի մաքսային կետ-բաժին: Մաքսային կետում ներկայացրել է բեռն ուղեկցող փաստաթղթերը արտահանում ձևակերպելու նպատակով: Ձևակերպումներն ավարտելուց և ապրանքը բացթողնելուց հետո ՀՀ ՊԵԿ Մաքսանենգության դեմ պայքարի վարչության աշխատակիցների կողմից կանգնեցվել է իր կողմից վարվող բեռնատար ավտոմեքենան և իրականացվել զննում, որի արդյունքում պարզվել է բեռի անհամապատասխանություն քաշի և տեսակի վերաբերյալ: Էդմոնդ Գրիգորյանը իր տրված բացատրությամբ հայտնել է, որ անհամապատասխանության մասին տեղյակ չի եղել բեռնաբարձման ժամանակ:

ԵԱՏՄ մաքսային օրենսգրքի 142-րդ հոդվածի համաձայն՝ «Մաքսային տարանցում» մաքսային ընթացակարգը կիրառվում է Միության մաքսային տարածքով, ինչպես նաև Միության անդամներ չհանդիսացող պետությունների տարածքներով օտարերկրյա և Միության ապրանքների փոխադրման համար:

ԵԱՏՄ մաքսային օրենսգրքի 302-րդ հոդվածի 3-րդ մասի համաձայն՝ Միության ապրանքները Միության անդամներ չհանդիսացող պետությունների տարածքներով Միության մաքսային տարածքի մի մասից Միության մաքսային տարածքի մեկ այլ մաս փոխադրման համար ենթակա են «մաքսային տարանցում» մաքսային ընթացակարգով ձեւակերպման:

ԵԱՏՄ մաքսային օրենսգրքի 107-րդ հոդվածի 1-ին մասի համաձայն՝ տարանցման հայտարարագրում նշվում են հետևյալ տեղեկությունները՝ հայտարարատուի, փոխադրողի մասին, ապրանքներն ուղարկող երկրի և նշանակման երկրի մասին, այն տրանսպորտային միջոցի մասին, որով տեղափոխվում են ապրանքները, ապրանքների անվանման, քանակի և արժեքի մասին՝ տրանսպորտային (փոխադրման) փաստաթղթերին համապատասխան ապրանքների ծածկագրի մասին, ապրանքների համաքաշի կամ ծավալի մասին, ինչպես նաև

ապրանքների քանակը՝ արտահայտված չափման լրացուցիչ միավորներով և այլ տեղեկությունների մասին:

ԵԱՏՄ մաքսային օրենսգրքի 111-րդ հոդվածի 8-րդ կետի համաձայն՝ գրանցման պահից մաքսային հայտարարագիրը դառնում է իրավական նշանակություն ունեցող փաստերի մասին վկայող փաստաթուղթ:

ԵԱՏՄ մաքսային օրենսգրքի 83-րդ հոդվածի համաձայն «մաքսային տարանցում» մաքսային ընթացակարգի հայտագրման դեպքում որպես հայտարարատու կարող են հանդես գալ փոխադրողը, այդ թվում նաև՝ մաքսային փոխադրողը, առաքողը, եթե նա Մաքսային միության անդամ պետության անձ է:

ԵԱՏՄ մաքսային օրենսգրքի 2-րդ հոդվածի 26-րդ կետի համաձայն՝ «փոխադրողն» այն անձն է, որն իրականացնում է ապրանքների և (կամ) ուղևորների փոխադրում (տրանսպորտային փոխադրում) Միության մաքսային սահմանով և (կամ) մաքսային հսկողության տակ գտնվող ապրանքների փոխադրում (տրանսպորտային փոխադրում) Միության մաքսային տարածքով: ԵԱՏՄ մաքսային օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ հայտարարատուն պարտավոր է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր, իսկ 3-րդ կետի համաձայն՝ հայտարարատուն, մաքսային միության անդամ պետությունների օրենսդրությանը համապատասխան, պատասխանատվություն է կրում:

ԵԱՏՄ մաքսային օրենսգրքի 308-րդ հոդվածի 1-ին կետի համաձայն՝ Միության անդամներ չհանդիսացող պետությունների տարածքներով Միության մաքսային տարածքի մի մասից Միության մաքսային տարածքի մեկ այլ մաս Միության ապրանքների փոխադրման դեպքում փոխադրողը, անկախ «մաքսային տարանցում» մաքսային ընթացակարգով ձևակերպված ապրանքների հայտարարատուն լինելու հանգամանքից, պարտավոր է. ապահովել ուղարկող մաքսային մարմնի կողմից սահմանված ժամկետում ապրանքներն ու դրանց փաստաթղթերը հասցնել ապրանքների առաքման վայրը, ապահովել ապրանքների, մաքսային կապարակնիքների և կնիքների, կամ նույնականացման այլ միջոցների պահպանվածությունը: Թույլ չտալ ապրանքների բեռնաթափումը, փոխաբեռնումը (վերաբեռնումը) և դրանց հետ կատարվող բեռնային այլ գործողությունների իրականացումը, ինչպես նաև այդ ապրանքները փոխադրող տրանսպորտային միջոցների փոխարինումը Միության անդամներ չհանդիսացող պետությունների տարածքներում՝ առանց ուղարկող մաքսային մարմնի թույլտվության:

ՀՀ մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 1-ին պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը

կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Էդմոնդ Գրիգորյանը 2022 թվականին փետրվարի 11-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել:

Այսպիսով, նյութերով պարզվել է, որ ՊԵԿ Արևելյան մաքսատուն-վարչության Բագրատաշենի մաքսային կետ-բաժնում լրացված 18.12.2021թ. թիվ 05100033/181221/0046718 տարանցման հայտարարագրում նշված ձկան քաշերը չի համապատասխանել ՀՀ-ից ՌԴ տեղափոխվող ձկների փաստացի քաշերին, այսինքն՝ Էդմոնդ Գրիգորյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, 18.12.2021թ. թիվ 05100033/181221/0046718 տարանցման հայտարարագրով, 18.12.2021թ-ի մաքսային զննման թիվ Գ/25-2021 ակտով, 17.12.2021թ-ի թիվ AM N 03-00003655 անասնաբուժական սերտիֆիկատով, 17.12.2021թ-ին լրացված թիվ B-08 հաշիվ-ապրանքագրով և Էդմոնդ Գրիգորյանի բացատրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ, 206 և 221-րդ հոդվածներով,

Ո Ր Ո Շ Ե Ց Ի՝

1. Էդմոնդ Գրիգորյանին (անձնագրի համար՝ BA 3190224) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ և նրան տուգանել 50.000 դրամ: /վճարումը 900005024055 հաշվեհամարին, կող՝ 19/

2. Որոշման մասին հայտնել Է.Գրիգորյանին՝ պարզաբանելով, ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ

ԱՐՄԱՆ ՄՆԱՑԱԿԱՆՅԱՆ